


JESUS ANG
PAGKABANHAW
KAG KABUHI



Ang Matun-an Nimo Sa Sini Nga Leksyon

Kadalag-an ni Jesus batok sa Kamatayon
Mga milagro sang pagkabanhaw
Kalig-unan sang Iya pagkabanhaw
Gahum sang Iya pagkabanhaw

Si Jesus kag ang Aton Pagkabanhaw
Ang saad Niya
Ang katumanan

Ang Kadalag-an ni Jesus Batok sa Kamatayon

Napatay si Jesus para sa aton mga kasal-anan kag nabanhaw liwat sa paghatag sa aton sang kabuhi nga walay katapusan! Amo ini ang tagipusoon sang Kristianismo. Ang dalagku nga mga kamatuoran sang pagkabanhaw sang isa ka matuod nga Dios, nagapalibot sa kamatuoran sang pagkabanhaw ni Jesus. Napaslawan ang bug-os nga plano sang kaluwasan kon wala Sia nabahaw gikan sa mga minatay. Apang bangod nga nalutos Niya ang kamatayon, makilala naton Sia karon subong nga buhi naton nga Ginuo kag Manluluwas.

Mga Milagro sang pagkabanhaw

Sa tion sang Iya pagpangalagad, ginpamatud-an ni Jesus ang Iya gahum batok sa kamatayon. Makabasa kita sang tatlo ka patay nga mga tawo nga ginhatagan Niya liwat sang kabuhi.

Ang pangulo nga si Jairo, nagpangabay kay Jesus nga ayuhon ang anak niya nga babayi. Sang magbalik na sia kaupod ni Jesus, ang bata napatay na.

Lukas 8:52,54,55. Kag ang tanan nagahibi kag nagahaya sa bata. . Apang sia nga nagakapot sa iya sa kamot nagtawag, nga nagasiling, "Anak, bangon ka!" Kag ang iya espiritu nagbalik, kag nagtindog sia gilayon.

Ang patay nga anak sang balong babayi sang Nain ginayayongan pakadto sa lublobngan sang masugata nila si Jesus. Ginpadulog Niya ang mga nagakompanyar sa lubong.

Lukas 7:14,15. Kag nagpalapit sia kag nagtandog sang liyaliya, kag ang mga nagdala nagdulog. Kag

nagsiling sia, “Pamatan-on, nagsiling ako sa imo, bangon ka.” Kag ang patay nagbangon, kag nagsugod sa paghambal. Kag ginhatag sia ni Jesus sa iya iloy.

Maayo nga mga abyan ni Jesus sanday Lazaro kag ang mga utod niya nga babayi nga si Marta kag si Maria. Napatay si Lazaro kag ginlubong. Pagkatapos sang apat ka adlaw nag-abot si Jesus.



Juan 11:43,44. Nagsinggit sia sa mabaskog nga tingog, “Lazaro, gowa ka.” Ang tawong patay naggowa, nga nasamburan sa mga kamot kag mga tiil sang mga isalambud sa lubong, kag ang iya nawong naputos sing panyo. Si Jesus nagsiling sa ila, “Hubari sia, kag palakta.”

Ang kaugalingon nga pagkabanhaw ni Jesus amo ang pinakadaku Niya nga kadalag-an batok sa kamatayon. Mortal sa gihapon yadtong mga ginbanhaw ni Jesus — mapatay sila liwat. Apang nabanhaw si Jesus gikan sa mga minatay sa lawas nga indi mortal — lawas nga indi na mapatay liwat. Ang kamatayon nalutos Niya.

Buhata Ini

1. Hingalani ang tatlo ka mga tawo nga ginbanhaw ni Jesus gikan sa mga minatay.

.....
.....

2. Daw ano na ka dugay nga nalubong si Lazaro? .

.....

3. Ano ang pinakadaku nga kadalag-an ni Jesus batok sa kamatayon?

4. Ano ayhan ang mahanabo sa plano sang kaluwasan kon wala mabanhaw si Jesus gikan sa mga minatay?

Kalig-unan sa Iya Pagkabanhaw

Paano naton mahibaloan nga nabanhaw si Jesus gikan sa mga minatay? Wala na sing iban nga kamatuoran sa kasaysayan nga ginpanghiwala sing labi ukon lubos nga nagapamatud-an nga matuod. Yari ang napulo lamang sang madamo nga mga kalig-unan.

1. *Panugiron sang mga soldado.* Ang napat-inan nga daw kaangay sang kuweba nga lulobngan ginbantayan sang mga soldado agud nga wala sing may makuha sang lawas ni Jesus kag magsiling nga nabuhi Sia liwat. Sa ika-tatlo nga kaagahon, nakita nila ang manugtunda nga nagabukas sang lulobngan. Naglinog ang duta. Puno sing kahadlok, nakita nila nga wala sing unod ang lulobngan! Nadula ang lawas ni Jesus! Nagdalagan sila kag nagpanugiron kon ano ang natabo.



2. *Wala sing unod nga lulobngan kag panapton nga ginasambud sa patay.* Wala nadugayi may pila ka mga babayi nga nagkadto sa lulobngan. Wala na didto ang lawas ni Jesus. Ang mga babayi ginsugiran sang duha ka manugtunda nga buhi si Jesus. Nagdalagan si Pedro kag si Juan pakadto sa lulobngan kag nakita nila nga wala na sing unod. Nadula ang lawas ni Jesus, apang didto



napahamtang sa sulod ang mga panapton nga ginsambud sa Iya lawas. Napiod ini sing mahipid katulad sang puloy-an nga ginbayaan sang

alibangbang. Wala sing makawat sang lawas nga magausik sang iya panahon sa pagbungkag kag sa pagpiod liwat sang mga panapton.

3. *Mensahe sang manugtunda.* Sa lulobngan ang mga manugtunda nagsiling sa mga babayi:

Lukas 24:5,6. Sang nagpalibog sila nahanungod yari karon, duha ka tawo nagtupad sa ila nga may panapton nga masilaw nagsiling ang mga tawo sa ila



“Ngaa bala nga ginapangita ninyo ang buhi sa tunga sang mga pata? Wala sia diri. kundi nabanhaw.”

4. *Mga pagpakita ni Jesus.*

Mga Binuhatan 1:3. Sa ila sia nagpakita sang iya kaugalingon nga buhi sa tapos ang iya pag-antos paagi sa madamong pagpamatuod, nga nagapakita sa sulod sang kap-atan ka adlaw, kag nagapamulong sang ginharian sang Dios.



Nagpakita si Jesus sa nagkalainlain nga mga tinion sa:

Isa ka guban sang mga babayi

Kay Maria Magdalena

Kay Pedro

Duha ka mga gintuton-an sa dalan pakadto sa Emaus

Napulo ka mga gintunton-an sa Jerusalem

Napulo kag isa ka mga gintuton-an sa Jerusalem

Pito ka mga gintuton-an sa Dagat sang Galilea

500 ka mga tumuluo sa Galilea sa isa ka tion

Kay Santiago nga Iya utod

Mga gintuton-an sa tion sang pagkayab, malapit sa

Betanya

Nagpakita si Jesus sa tatlo ka tawo pagkatapos nga nakabalik na Sia sa langit. Didto nila Sia nakita.

5. *Ang kinaiya sang lawas ni Jesus.* Ang sari sang lawas nga naangkon ni Jesus nagpamatuod sang duha ka bagay:


1) Ang nakita sang mga tumuluo indi lamang isa ka palanan-awon ukon isa ka espiritu. Nagkaon si Jesus kaupod nila. Nahikap nila Sia. May matuod Sia nga lawas nga may unod kag mga tul-an



2) Indi lamang nga naulian Sia gikan sa pagkawalay animo ukon gikan sa kamatayon sa mamalatyon man gihapon nga lawas. Naangkon Niya ang mahimayaon, nabanhaw nga lawas nga indi na mapunggan sang lawasnon nga mga dulonan, kasakit, ukon kamatayon. Nakalusot Sia sa sirado nga mga ganhaan. Nagpakita kag nadula Sia sa ila mga panulok. Nagbalik Sia sa langit nga ginatulok sang madamo

Ang pagkabanhaw naghatag sang bag-o nga gahum sa Iya lawas.


6. *Bautiso sa Balaan nga Espiritu.* Ang nahanabu sa adlaw sang Pentecostes isa ka direkta nga katumanan sang saad nga ginsaad sang nabanhaw nga Kristo. Ang nagapadayon nga presensya sang Iya Espiritu nagapamatuod nga buhi si Jesus.



7. *Mga pamatuod sang mga Kristohanon.* Wala sing unat ang pagpamatuod sang mga sumolunod ni Jesus sang kamatuoran nga nabanhaw Sia gikan sa mga minatay. Ginsugo sila nga ipanghiwala ini kay kon indi pagapatyon sila, apang nagpili sila sang kamatayon. Wala kuntani sila napatay sa pagdepena sang kabutigan.



8. *Ang pagliso ni Saulo.* Ang maalam nga doktor sang Judio nga si Saulo, nagtinguha sa pagpanas sang Kristianismo. Samtang yara sia sa dalanon pakadto sa Damasco sa pagdakop sang mga Kristohanon, sia mismo ang nadakop ni Ginuong Jesus. Nagsidlak gikan sa langit ang isa ka kapawa nga masilaw pa sa silak sang adlaw. Gikan sa amo nga kapawa gintawag ni Jesus ang ngalan ni Saulo kag



nagpakighambal sa iya. Gintugyan ni Saulo ang iya kabuhi kay Jesus kag nahimo nga bantog nga apostoles nga si Pablo.



9. *Kristianismo.* Ang relihiyon Kristiano nasandig sa kamatuoran sang pagkabanhaw. “Ang Kristianismo napasad sa isa ka wala sing unod nga lulobngan.”

10. *Pagpakighambal kay Jesus.* Ang pagpakig-atubang Kay Jesus nagbaylo sang aton mga kabuhi. Nagapagkighambal kita sa Iya adlaw-adlaw. Ginasabat Niya kita. Ang isa ka ambahanon nagasiling:

Nagaalagad ako sa nabanhaw nga Manluluwas,
Yari Sia sa kalibutan karon . . .

Mamangkot ka sa akon kon paano ka nahibaloan
nga nagakabuhi Sia?

Nagakabuhi Sia sa sulod sang akon tagipusoon.



Buhata Ini

5. Isulat ang napulo ka mga kabangdanan nga nagpatuo sa aton sa pagkabanhaw ni Jesus.

.....
.....
.....
.....
.....
.....
.....
.....
.....
.....
.....

6. Hunahunaa: Ano ang pagkaanggid sang lawas ni Jesus sang sa una? Ano ang kinatuhay sini? Buot mo bala nga makaangkon sang mahimayaon nga lawas?

Gahum sang Iya pagkabanhaw

Napatay sa krus si Jesus apang nalutos Niya ang kamatayon didto. Ginhimo Niya ang krus – simbolo sang kahuloy-an kag namusingan nga kadunggan – nga isa ka simbolo sang katubsaan, gahum, kag kadalag-an. Ang lawas ni Jesus ginsulod sa lulobngan, apang ang lulobngan indi makahimo sa Iya nga binilanggo. Ang kamatayon ginlutos Niya kag nabanhaw liwat sa pagpa-

kigbahin sinang kadalag-an sa tanan Niya nga mga sumolunod. Nagsulat si Pablo nahanungod sa pagkilala kay Jesus sa gahum sang Iya pagkabanhaw. Ano ining gahum?

1) *Kalig-unan kon si sin-o si Jesus.* Bangod kay nabanhaw Sia gikan sa mga minatay, nahibaloan naton nga amo Sia suno sa ginhambal Niya nga Sia – ang anak sang Dios kag Manluluwas sang kalibutan.

2) *Kapat-uran sang kaluwasan.* Bangod kay nabanhaw si Jesus, nahibaloan naton nga ginbaton sang Dios ang Iya halad para sa aton. May kapatawaran sa sala ang bisan sin-o nga magtuo sa Iya.

3) *Bag-ong kabuhi sa pagpakig-angot kay Jesus.* Ang nabanhaw naton nga Ginuo nahimo nga Ulo sang Iglesia. Kita ang Iya lawas. Kaupod naton Sia sa tanan nga tion. Yari sa aton ang Iya kabuhi. Nagapanghikot ang Iya gahum paagi sa aton.

1 Pedro 1:3. Bangod sang iya dakung kaluoy natawo kita liwat sa paglaum nga buhi paagi sa pagkabanhaw ni Jesu-Kristo.

4) *Kadalag-an kay Jesus.* Ang pagkabanhaw ni Jesus napamatuod nga nauutos Niya si Satanas, sala, kag kamatayon. Indi na kinahanglan nga magkabuhi ka sa kahadlok ukon pagapaantuson sang sala kag pagsulay, kon kaupod mo Sia. Ang imo pagkalutos mahimo ni Jesus ang isa ka kadalag-an.

5) *Paglaum.* Ang mga Kristohanon makapanga-tubang sang kamatayon nga may paglaum. Ang pagkabanhaw ni Jesus amo ang garantiya sang isa ka maayo nga kabuhi sa pihak sang lulobngan. Nagsiling Sia:

Juan 14:19. “Bangod nga ako nagakabuhi, kamo magakabuhi man.”

6) *Pagkabanhaw*. Sa pagkilala kay Jesus sa gahum sang Iya pagkabanhaw magalakip sang aton man pagkabanhaw katulad sang Iya, nga may amo man nga sari sang lawas.

1 Mga Taga Corinto 15:20. Apang karon si Kristo nabanhaw ang panganay sang mga nagakatulog (napatay).

Buhata Ini

7. Hingalani ang anum ka mga butang nga mabaton naton paagi sa pagkabanhaw ni Jesus. Linyahi ang idalum sang mga butang nga naagihan mo na.

.....
.....
.....
.....
.....
.....

8. Pasalamati ang Dios bangod sang kahigayunan nga makilala si Jesus sa gahum sang Iya pagkabanhaw.

Si Jesus kag ang Aton Pagkabanhaw

Ang saad Niya

Si Jesus nagsiling, sa wala pa Niya mapabangon si Lazaro:

Juan 11:25, 26. “Ako ang pagkabanhaw kag ang kabuhi; ang nagatuo sa akon, bisan mapatay sia, apang magakabuhi, kag ang bisan sin-o nga nagakabuhi kag nagatuo sa akon indi na gid mapatay.”

Sang magtawag si Jesus sa bukas nga lulobngan: “Lazaro, gowa ka!” Si Lazaro naggowa nga buhi kag maayo. Sa pila ka adlaw magabalik si Jesus sa duta. Sa Iya pagpanawag, ang mga lawas nga madugay na nga nahimo nga yab-ok kag abo magabangon sa isa ka bag-o nga kabuhi, katulad sang mga tanom nga naggikan sa binhi. Magaangkon kita sang makatilingala nga bag-ong mga lawas katulad sang Iya indi mamalasyon, mahimayaon nga lawas.

Juan 5:24, 26, 28, 29. “Sa pagkamatuod, sa pagkamatuod, nagasiling ako sa inyo, ang nagapamati sang akon pulong kag nagatuo sa nagpadala sa akon may kabuhi nga walay katapusan; indi sia paghukman kundi naglaton gikan sa kamatayon pa kabuhi Kay subong nga ang Amay may kabuhi sa iya kaugalingon, sa amo nga bagay ginhatag niya sa Anak man nga may kabuhi sa iya kaugalingon. . . Dili kamo matingala sini; kay ang takna magaabot nga ang tanan nga yara sa lulobngan magapamati sang iya tingog kag magagowa, ang mga makahimo sing maayo, sa pagkabanhaw nga sa kabuhi, kag ang mga nakahimo sing malaut, sa pagkabanhaw nga sa paghukom.”

May mensahe para sa imo ang sementeryo sa inyo duog. Sa iban mensahe ini sang pagkawalay paglaum. Ang mga lulobngan nagapahanumdom sa aton nga tanan kita mapatay. Nabuhi kita sa sining kalibutan nga wala sing dala kag bayaan naton ini nga wala sing dala. Apang indi pa ina tuman. Panumdoma nga wala sing unod ang lulobngan ni Jesus! Kag ang Iya pagkabanhaw amo ang garantiya sang imo pagkabanhaw kon imo Sia Manluluwas Mapatay ang imo lawas, apang ang imo espiritu indi mapatay. Bisan pa ang lawas mo magbalik sa yab-ok, pagabuhaton ini liwat ni Jesus. Sia ang Pagkabanhaw kag ang Kabuhi.

Buhata Ini

- 9. Ano ang pinakapat-ud naton nga garantiya sang pagkabanhaw?
 - ... a) Pagbag-o sang kabuhi sa aton kinaiya.
 - ... b) Pagkaisa sa pagtuo sa kabuhi pagkatapos sang kamatayon.
 - ... k) Ang pagkabanhaw kag saad ni Jesus.
- 10. Sauloha ang Juan 11:25, 26.
- 11. Ano ang tawag ni Jesus sa Iya kaugalingon sa Juan 1:25?

Ang katumanan

Nagsaad si Jesus nga magbalik para sa Iya mga sumolunod sang wala pa Sia makabalik sa Iya puloy-an sa langit.

Juan 14:3. Kag kon ako makakadto kag makaaman sa inyo sing duog magabalik ako kag dalhon ko kamo kaupod nakon, agud nga kon diin ako didto man kamo.

Kap-atan ka adlaw pagkatapos sang pagkabanhaw ni Jesus, ang Iya mga sumolunod nagtan-aw sa Iya samtang nagakayab Sia pa langit. Pagkatapos and duha ka manugtunda naghatag sa ila sang mensahe:

Mga Binuhatan 1:11. “Mga tawo sa Galilea, ngaa bala nagatindog kamo nga nagatulok sa langit? Ining Jesus, nga ginbayaw pa langit gikan sa inyo, magabalik sa amo nga bagay subong nga nakita ninyo Sia nga nagapalangit.”

Ginpahayag sang Dios kay Pablo ang madamo nga mga detalye sang pagkabanhaw nga nahanabo sa tipon nga magbalik si Jesus. Si Juan nagsulat man nahanungod sini.

I Mga Taga Corinto 15:37,38, 42-44, 49, 51-54, 57. Kag ang ginsab-ug mo indi ang lawas nga mangin amo, kundi ang uyas lamang, ayhan sang trigo ukon sang iban nga uyas. Apang ang Dios nagahatag sini sing lawas suno sa nahamut-an niya, kag sa tagsa ka binhi isa ka binhi nga iya kaugalingon. Amo man ang pagkabanhaw. Ginsab-ug pagkadimadinulonton, ginbanhaw sa pagkadimadinulonton. Ginasab-ug sa pagkadimadinulonton, ginabanhaw sa pagkadimadinulonton. Ginasab-ug ini sa kahuloy-an, ginabanhaw sa gahum. Ginsab-ug ini sa lawas nga unodnon ginabanhaw nga lawas nga espirituhanon. Kong may lawas nga unodnon, may lawas man nga espirituhanon. Subong nga gindala naton ang larawan sang tawong dutan-on, dalhon ta man ang larawan sang tawong langitnon.

Yari karon! Nagasugid ako sa inyo sing tinago. Indi kita tanan magakatulog, kundi kita tanan pamaylohan, sa isa ka tion, sa isa ka pagpamisok, sa katapusan nga budyong. Kay magatunog ang budyong, kag ang mga patay banhawon nga dimadinulonton, kag pamaylohan kita. Kay ining madinulonton kinahanglan magsuklob sang pagkadimadinulonton, kag ining mamalasyon, kinahanglan magsuklob sang pagkadimamalasyon. . . niyan matuman ang pulong nasulat, "ang kamatayon ginlamon sa pagdaug." Salamat sa Dios nga naghatag sa aton sang pagdaug paagi sa aton Ginuong Jesu-Kristo.

Mga Taga Filipos. 3:20, 21. Apang ang aton pagkabanwahanon yadto sa langit, kag gikan sini ginahulat naton ang Manluluwas, si Ginuong Jesu-Kristo, nga magabalhin sang aton kubos nga lawas nga mangin subong sa iya mahimayaon nga lawas, paagi sa gahum

nga makapasarang sa iya bisan sa pagsakop sa iya tanan nga butang.

1 Juan 3:2, 3. . . . Nahibaloan ta nga kon magpahayag sia mangin kaangay kita niya, kay makita ta sia subong nga sia gid. Kag ang tagsatagsa nga may iya sining paglaum sa iya nagapaputli sang iya kaugalingon subong nga sia putli.

1 Mga Taga Tesalonica 4:16-18. Kay ang Ginuo gid magakunsad gikan sa langit nga may singgit sang pagmando, sa tingog sang puno nga manugtunda, kag sa budyong sang Dios. Kag ang mga napatay kay Kristo mabanhaw sing una; niyan kita nga mga buhi, nga nabilin, sabniton sing tingub upod sa ila paibabaw sa mga panganud sa pagsugata sa Ginuo sa kahawaan; kag niyan mangin kaupod kita sing dalayon sa Ginuo. Busa maglinipayay kamo sa sining mga pulong.

Buhata Ini

12. San-o ang aton pagkabanhaw?

.....

13. Ano ang himuon naton suno sa 1 Juan 3:3 agud makahanda?

.....

14. Linyahi ang mga bahin sang Biblia nga may daku nga bili ukon kahulogan sa imo.

15. Usisaa ang imo mga sabat kag sulati ang imo rekord sang bumolutho para sa leksyon 9.

Leksyon 9 – Mga Sabat

Ang mga pamangkot nagakinahanglan sang 26 ka mga sabat. Kon may husto ka nga sabat halin sa 23 tubtob sa 26 labing maayo; halin sa 19:tubtob sa 22, maayo; halin sa 13 tubtob sa 18, kasarangan. Kon manubo sa 13 ang husto mo nga sabat, basaha liwat ang leksyon.

1. Anak nga babayi ni Jairo, anak nga lalaki sang balong babayi sang Nain, Lazaro
2. Apat ka adlaw
3. Ang Iya kaugalingon nga pagkabanhaw.
4. Napaslawan
5. 1) Panugiron sang mga soldado. 2) Wala sing unod nga lulobngan kag panapton nga ginasambud sa patay. 3) Mensahe sang manugtunda. 4) Mga pagpakita ni Jesus. 5) Ang kinaiya sang lawas ni Jesus. 6) Bautiso sa Balaan nga Espiritu. 7) Mga pamatuod sang mga Kristohanon. 8) Ang pagliso ni Saulo. 9) Kristianismo. 10) Pagpakighambal kay Jesus.
- 7.1) Kalig-unan kon si sin-o si Jesus. 2) kapat-uran sang kaluwasan. 3) Bag-ong kabuhi sa pagpakig-angot kay Jesus. 4) Kadalag-an kay Jesus. 5) Paglaum. 6) Pagkabanhaw.
9. k) Ang pagkabanhaw kag saad ni Jesus
11. Ang Pagkabanhaw kag ang Kabuhi
12. Sa pagbalik ni Jesus.
13. Nagapaputli sang iya kangalingon

Kadamuon sang husto nga sabat. Grado
Karon sulati ang imo rekord sang bumolutho para sa
leksyon 9.